

[37] CHAPITRE IV.

ESPREUUE DE LA CONSTANCE & DU COURAGE DE
CETTE EGLISE, PARMY LES OPPOSITIONS
DES INFIDELES.

VN des premiers Chrestiens de ce païs, parlant il y a quelque temps à vn nouveau Catechumene, qui luy demandoit quelque aduis auant que de receuoir le Baptesme, luy respondit; Mon frere ie n'ay que deux choses à te dire. La premiere que iamais tu ne feras bon Chrestien, si tu ne souffres beaucoup d'iniures & de calomnies pour ta foy: quand tu te verras hay des infideles, mesme de ceux qui maintenant ont plus d'amour pour toy, alors resiouïs toy, & pense que vrayment tu commences à estre Chrestien. La seconde que tu prennes garde à ne te pas indigner contre ceux qui te feront souffrir: prie Dieu pour eux, & dis luy dans ton cœur qu'il leur fasse misericorde, & leur donne à connoistre le mal-heur dans lequel ils viuent.

En effet ce bon Chrestien auoit raison; [38] car il est vray que la marque la plus affeurée que nous ayons en ces païs de la foy d'un Chrestien, est de le voir incontinent accueilly de la calomnie: & si la foy de quelques-vns nous est douteuse, si d'aucuns apostasient, ayans receu le Saint Baptesme, ce sont ceux iustement qui viuoient le plus en repos, & comme à couuert de l'orage.

Ignace Oijakonchiaronk vn des plus riches, & des